

Baitsi pina hotatsia Kamalipetsutothatsia nawailababiaba, nawailababiaba, dana pina apayabiaba, dana pina apayabiaba, dana pina apayabiaba, pebarüpewaxi yaekabiaba. Pehewaxi pina pekowütha nawailababiaba, hiwisitoxitha pina kanawailababiabahe, pihamonae pina nakuenebabiaba. pekowütha pina baitsi xuatha, Ekonaewi notatsi. Belia baha phaphana. Hotatsia pina baha we...! wetsika baha Sukuarapü wetsika baitsi baha Tsamanimonae pehunaetsutotsia eka pina. Xanü hane aponataenü. Baha pina ahibi tsarubena, pina duhaiwi tokaponatsi, duhaiwi pina kawiruwi tokaponatsi, hakawi pina, wemaiwi pina, tokaponatsi. Pina pihamonae damukuxitha pina toyawünüwiheba peyawühünüxaehawa. Padamukutha towiheba, padamukutha towiheba duhaiwi, athübü pihawi. Pehewaxi pina baha nawailababiaba. Itsamatakabi pina baha nawailaba, nawailaba. Nexatha pina baha hematha barüponatsi. Baha penawailabipehewaxi baha yai! Pina ahibi tsekae. Baha pina pemaübiwayotsi pitsiboyotha pina metha baha saikaya rukeka, wüpamonae pehewaxi baitsi pina nawailaba. Pihamonae pina daxita nakueneba, ubawonopa, baha pina pitsiwi pexi itaxanapata, wüpetaxukowüxi pina baha tahetamaxütha. We...! Pehewaxi pina konihawaxi peyakotaekoninüxi tabuhonanunubenabiaba, pepobitsaütoyo pina kowü enaponabiaba, kowü nubenaxuababiaba. Pina baha hematha belia, bepepobitsaütoyo pina kowü bepebarümatatoyoronaxuabatsi, baha pina baha ahibi, hota akowübi. Metha baha kahunayatsi.